

SDA i SNSD udruženi protiv razvoja

Najdraže su im prazne livade

Piše: **Ernad Metaj**

Umjesto privlačenja investitora u Bosanskom Petrovcu su krenuli da već postojećim pokazuju put ka izlazu. Jedan od najvećih farmara u BiH Jusuf Arifagić raskinuo je sve ugovore s Općinom Bosanski Petrovac o korištenju poljoprivrednog zemljišta koje je trebalo biti okosnica za realizaciju višemilionske investicije.

“Ne znam šta da ti kažem, sin-ko. Ne želim da ova neprirodna koalicija u Bosanskom Petrovcu, u kojoj su SDA, SBB, SNSD, DF i Socijalistička partija, preko mene vodi rat sa načelnikom Općine. Oporavaj mi zemlju koja mi je dodijeljena, a bez zemlje ja ne mogu hraniti stoku, ne mogu dalje razvijati biznis”, rekao nam je Arifagić.

Ko tjera Arifagića

Arifagić je u posljednje dvije godine koristio više od 850 dunuma zemljišta u Bosanskom Petrovcu, kupio je jednu propalu farmu i počeo preseljavati dio krava iz Kozarca kod Prijedora. Za svoje planove koji su trebali rezultirati zapošljavanjem oko 50 radnika, svojevremeno je imao jednoglasnu podršku Općinskog vijeća. Nakon lokalnih izbora, oko SDA koja je nekad podržavala aktuelnog načelnika Zlatka Huijića, inače nezavisnog kandidata, okupila se nova većina i počeli su problemi. Vijeće je donijelo odluku da se preispita dodjela zemljišta Arifagiću.

“Mi ne tjeramo nikoga, samo želimo da se poštuje zakon. Pojavili su se ljudi koji su tvrdili da kod dodjele zemljišta Arifagiću nisu ispoštovane zakonske procedure. Ako je neko protiv Arifagića, onda je to općinska administracija koja nije dobro uradila svoj posao”, za Dane je istakao

Jusuf Arifagić raskinuo je sve ugovore koje je sa Općinom Bosanski Petrovac imao za korištenje zemlje i tako preduhitrio Zlatka Huijića, koji se nije htio odreći te investicije uprkos pričama u Općinskom vijeću



Arifagić: Ja nisam jedan od tih koji žele na kafama stvari završavati i izgleda da je to ključni problem

Midhat Hibić, predsjednik općinske organizacije SDA.

Kao opravdanje za ovakve postupke navodi se da nije bilo raspisanog javnog poziva za dodjelu zemljišta, da je cijena manja od zakonom predviđene, ali i da Arifagić zemljište nije priveo namjeni za koju ga je uzeo.

Za načelnika Huijića stvari su potpuno jasne. Ovo je samo nastavak obračuna prvenstveno pojedinaca iz SDA i SNSD-a s njim. U ugovorima s Arifagićem ne vidi ništa sporno, posebno kada je riječ o cijeni, kaže da je mogao, dodijelio bi zemljište džaba.

“Nama su potrebni ljudi koji imaju viziju i koji žele zapošljavati. Ja sam javno rekao da neću raskinuti ugovore, ali Arifagić me preduhitrio. Bez obzira na to što je ovamo već prebacio 250 krava, on je to učinio, ne želi da ga bilo

ko pokušava predstaviti kao kriminalca. Koliko znam, već ima obećanja iz drugih gradova da će mu obezbijediti potrebne površine zemljišta kako bi mogao razvijati svoju višemilionsku investiciju”, istakao je Huijić.

Vijećnik Srpske napredne stranke Dejan Prošić smatra da se iza svega kriju sitni politički interesi, a da će najveću štetu trpjeti građani Bosanskog Petrovca. Prema njegovom mišljenju, nepotrebno su se podizale tenzije, jer osim što nije bilo mišljenja kantonalnog pravobranitelja, pokazalo se da nema nikakvih zloupotreba koje bi bile vrijedne vanrednog zasjedanja Općinskog vijeća.

“Evo, biće raspisan javni poziv za korištenje tog zemljišta i ja se plašim da se niko neće javiti. Mi imamo oko 5.000 hektara neobrađenog zemljišta i trebalo bismo se baviti izradom plana upravljanja, umjesto da tjeramo i ono malo korisnika koji su legalno koristili zemljište”, rekao nam je Prošić.

Kafa i inspekcija

Samo prije dvije godine u Bosanskom Petrovcu, ali i u USK-u, raširenih ruku dočekali su Arifagića, radujući se što će dio kapaciteta iz Republike Srpske preiseliti s druge strane entitetske linije. U Kozarcu nije bilo dovoljno zemljišta za njegove potrebe, a tamo gdje ga ima, nedostaje razumijevanja.

Nadležnosti kantona i općine se preklapaju nad dodjelom

zemljišta, što uglavnom pogodu je velikom broju bespravnih korisnika. Zbog njih Arifagić nije u proteklom periodu realizovao zacrtane planove, a jedini odgovor nadležne kantonalne inspekcije na prijavu da mu nomadi uzurpiraju zemljište, prema njegovim tvrdnjama, bio je poziv da dođe na kafu.

“Ja nisam jedan od tih koji žele na kafama stvari završavati i izgleda da je to ključni problem”, kaže Arifagić.

Za njega su priče o tome kako je jeftinu kupio farmu i onda je stavio pod hipoteku u želji da što lakše dođe do novca, smiješne. Čudno mu je da ljudi koji plasiraju takve priče znaju da je farmu kupio za 400.000 maraka, da je dobio kredit, a ne znaju, ili jednostavno neće da znaju, kako je najveći proizvođač mlijeka u RS-u.

Indikativno je da se Općinskom vijeću prvo obraća srpsko stanovništvo Krnjeuše i Drinića, koje zbog njega, navodno, želi seliti, jer ostaje bez zemlje koju je koristilo. Nakon toga se pojavio izvjesni Haris Mešanović, mašući općinskim papirima kako parcele u Prkosu i Oraškom brdu Arifagić nije dobio po pravilima. Sumnja Arifagić da iza svega stoji scenarij pojedinaca iz SDA i SNSD-a, koji preko njega žele srušiti načelnika Zlatka Huijića.

“To nisu vrijedni ljudi da bih se ja bavio njima. Narod će najbolje prosuditi, kao što je to uradio i na izborima. Svjesni su oni da su sa svojim igrama pretjerali,

ali je to sada teško priznati, pa pokušavaju na svaki način diskreditovati mene, a onda i Arifagića”, kategoričan je Huijić.

Za Dane Huijić otkriva kako su stanovnici Krnjeuše okupljeni u lokalnu zadrugu 25 godina koristili državno zemljište bez nadoknade, dok u Mešanoviću vidi samo još jednog mešetara koji vreba svoju priliku u već uhodanom sistemu zloupotreba sa poljoprivrednim poticajima.

“On je u Bosanskom Petrovcu kupio 36 dunuma zemlje, ne živi tu i nikad nije uplatio nijednu marku u općinski budžet. Imamo i mi svoje informacije, tako da ćemo uskoro tražiti da se nadležni pozabave njegovom navodnom poljoprivrednom proizvodnjom. Biće interesantno vidjeti

Bosanski Petrovac:
Ko će se javiti na tender za 5.000 neobrađenih hektara

Hibić: Ako je neko protiv Arifagića, onda je to općinska administracija koja nije dobro uradila svoj posao



Huijić: Sad su pretjerali

uzgaja li na određenim lokacijama kulture koje tu nikad nisu uspijevale i ostvaruje li i kolike poticaje”, rekao je Huijić.

Interesantno je da Svetka Dukića iz SNSD-a i Midhata Hibića iz SDA nije zanimalo ko je Mešanović i čime se bavi, kao ni to da li su mještani Krnjeuše plaćali naknade za korištenje državnog zemljišta. Na pitanje hoće li tražiti da se ispituju svi ugovori o korištenju zemljišta, Hibićev odgovor je bio da ne može grah razbacivati.

“Ako vam pravobranilac za nešto kaže da nije uredu, šta biste vi učinili”, pita Hibić.

Pravdajući svoje postupke, koalicioni partneri Arifagiću zamjeraju da nije ispunio sve što je na Općinskom vijeću prezentirao. Kažu, planirano je da osim Arifagićeve farme, krave stignu i do stanovnika Bosanskog Petrovca, a sve sa ciljem privlačenja skandinavskih proizvođača mlijeka.

Ove priče se drži i DF-ov vijećnik Rusmir Mujadžić. On ne vidi ništa loše u odlukama Vijeća za preispitivanje ugovora, mada priznaje da postoje neložičnosti, posebno sa pričom Harisa Mešanovića.

Logično, ili ne, ali Arifagić definitivno odlazi iz Bosanskog Petrovca. Ponuda ima, posebno iz Prijedora, gdje su se lokalne vlasti angažovale da mu pronađu dovoljne površine zemljišta. Sam Arifagić kaže da su sve opcije otvorene, pa i odlazak van BiH.

“Nije li malo čudno da su iz SDA već sada podnesene dvije krivične prijave protiv načelnika Krupe zbog ugovora s mojom firmom? Sine, s ovakvim ljudima u BiH možeš samo na mezarje ili preko granice”, kaže razočarani Arifagić.

On podsjeća da razvoj njegove farme prije svega zavisi od namjenski proizvedene ili nabavljene hrane, što u svojim interpretacijama svi zaboravljaju. Iz Bosanskog Petrovca je prije svega zahvaljujući Zlatku Huijiću, krenula borba protiv šumarskog lobija u Krajini. Na Ustavnom sudu FBiH zbog diskriminacije općine Bosanski Petrovac oboren je Zakon o šumama USK-a. Novi nikad nije usvojen, a izgleda da su se u Krajini uplašili da sada ne krene i priča o lobijima kojima, kako stoje stvari, najviše odgovaraju prazne livade. ■

